

Lita Nampa 1 Peterlu Walkatjunkunytja 1 Peter Nyangatja Ngaḁmanytju Nyakula Wangkanytjaku

Nyangatja Godaku tjukurpa Peterlu walkatjunkunytja. Paluru lita kutjara walkatjunu, ka nyangatja lita nampa 1 paluru walkatjura iyantja Jesuku walytja tjutakutu ngura kutjupa tjutangka nyinanyangka. Paluru tjana panya ngaltutjara nyinangi panya anangu kutjupa tjutanku tjananya rawangku kuraningi munu pikantanangi tjana Jesunya wanannyangka. Kutjupa tjaraya tjailangka tjarpatjunangi. Ka Peterlu lita nyangatja tjanampa walkatjunu tjananya kunpuntjikitjangku tjana Godaku rapa pukulpa nyinanytjaku kurannyangka tjituru-tjitururira wantinytja wiya.

Munu paluru tjanala tjukurpa tjakultjunangi Jesunyatjara panya paluru kunpu pulka mulapa ngaranyi munu anangu tjuta wankarunkupai tjana palumpa mulamularingkunyangka. Munu Peterlu tjananya wangkangi Godala wanganarangku kulira tjukaruru nyinanytjaku munu pukulpa kalypa wirura nyinanytjaku mukulya alatjitu. Panya Jesunya kuwari nguwanpa malaku pitjanya nyuntunya nganananya mantjintjikitja.

Tjukurpa nyanganpa ngarinyi:

1:1-2 Peterlu ngaḁmanytju wangkanytja

1:3-12 Godalu palumpa walytja tjuta witulya pulkanku atunymara kanyintja ngula Tjintu Malatjangka wankarunkunytjikitjangku

- 1:13—2:10 Godalulanya mantjину palya mulapa nyinanytjaku kura tjuṭa wantira
- 2:11—3:7 Jesunya puṛunypa mayatja tjuṭangka wanganaranku kulintjaku
- 3:1-7 Wati minyma kuriṛara wiruṛa palyanyku nyinanytjaku
- 3:8—4:19 Kutjupangku nyuranya kurannyangkaya uti Godaku mulamularingama munu rawa palyanyku nyinama
- 5:1-11 Peterlu wangkanytja Jesuku walytjapiti atunymankupai tjuṭangka
- 5:12-14 Peterlu tjukurpa malatja wangkanytja

Peterlu Ngaṇmanytju Wangkanytja

¹ Uwa, Jesuku walytja tjuṭa, ngayuluna Peternya Jesuku Christaku tjukurpa panya paluruṇi wituṛa iyanu tjukurpa palumpa anangu tjuṭangka wangkanytjaku. Kana lita nyangatja nyurampa walkatjunanyi Jesuku walytja tjuṭaku. Panya nyuranya Godalu ngurkantanu palumpa walytja nyinanytjaku. Palu panya anangu tjuṭangku nyuranya rawangku kuraṛa pungknyangka nyura ngura walytja wantikatira ngura malikitja tjuṭakutu anu Puntula, Kalaitjiyala, Kapatu-tjiyala, Aitjala munu ngura panya Pitjiniyala tjanalakutu. Kana nyangatja palulanguṛu nyurampa lita walkatjunanyi.

² Panya Mama Godalu nyuranya ngaṇmanytju kulintjatjanungku ngurkantanu palumparinytjaku, ka panya Kurunpa Milmitu nyuranya palyanu palumpa walytjaringkunyitjaku. Ka nyara palulanguṛu Godaku walytjaringkula nyura Jesula Christala wanganaranku kulini munu nyura Godala kalypa nyinanyi, panya Jesunya nyurampa ngalkilpa ilura milkali tjtingu, ka

milka_{li} nyara paluru tjutinytjitjangka Godalu nyuranya kalypangku pungguwiyangku wantingu.

Ka Godalu nyuranya titutjarangku mukulyangku kanyinma munu nyuranya kurunpa rapara pukulmanama.

Mantangka Nyangaya Nyuranya Kurara Punganyi Palu Godalu Wiru Mulapa Nyurampa Ilkarangka Kanyini

³ Uwa, mirawanimala Godanya Mayatja Jesuku Christaku Mama, panya ngaltunytju pulkangkulanya palumpa walytjaringkunyjtaku palyanu, palumpa katja Jesunya Christanya ilunyangka wankara pakaltjingara. Kala nyara palulanguru ngana_{na} pukulpa rapa pulka nyinanyi ilunytja kulira nguluringkunyjtja wiya. ⁴ Munula pukultu kulini panya Godalu pulka mulapa kanyini ngana_{nanya} ungkunyjtikitjangu. Paluru ngura ilkaritjangka nganampa kanyini, panya ngura nyara palula wiru mulapa titutjara ngarapai, wiyaringkupai wiya, ka kutjupangku putu alatjitu kuralku. ⁵ Panya ngana_{na} Godaku mulamularingkunyangka paluru witulya pulkangku ngana_{nanya} atunymara kanyini ngula Tjintu Malatjangka wankarunkunyjtikitjangu. ⁶ Ka nyura ara nyanga palunya kulira pulkara pukularinyi. Kuwari nyura tjinguru tjituru-tjitururipai kura kutjupa kutjupa tju_{ta} nyurala wirkankunyangka, palu nyanga palunya tjananya nyura kulilwiyangku wantira waintara kulini panya paluru nyuranya ngula wankarunkuku. Palulanguru nyura kuwari pukulpa titutjara nyinanyi. ⁷ Panya tjituru-tjituru nyurala wirkankunyangka Godalu nyanganyi munu kulini alatji, "Tjinguruya ngayuku mulamularinganyitu munta tjinguruya ngayuku watarkuringu." Palu tjituru-tjituru pulka nyurala wirkankunyangka nyura kulilwiyangku wantira palumpa kutju mulamularingkunyangka

Godanya pulkara pukularinyi munu kulini, “Mulapaya nyanganpa ngayuku mulamularinganyi watarkurinytja wiya.”

Uwa, Godaku mulamularingkunyjtaku wiru mulapa ngaranyi. Panya manta winkingka anangu tjuťanguku mani kutju pulkara kulilpai, palu mani nyaratja unytju ngarapai, kaya ngula mani wiyaringkunyaangka palunya kulintja wiyaringanyi, palu wiru mulapa nyangatja Godaku mulamularingkunyjtja. Ka palulangu ru nyuranya ngula pulkara mirawanira palyanmankuku Mayatja Jesunya malaku pitjanytja-arangka. ⁸⁻⁹ Nyura panya Jesunya nyakunyjtja wiya, palu nyura palumpa pulkara mukuringanyi. Munu nyura kuwari kulu nyakunyjtja wiya, palu nyura palumpa titutjara alatjitu mulamularinganyi, munu nyura kurunpa winki pukulpa pulka nyinanyi, panya Godalu nyuranya rawa mulamularingkunyaangka wankaru kanyini.

¹⁰ Nyanga palunya panya wati Godaku wangkatjara tjuťanguku nganmanytju iriti walkatjunangi. Palu tjana putu kuliningi, “Yaaltjingara Godalu mukulyanguku anangu tjuťa wankarunkunyjtjikitjangku kulini?” Munuya palulangu ru rawangku pulkara kuliningi Godalu tjanala wangkanyaangka. ¹¹ Panya Christaku Kuruntu tjanala unngungu ru tjakultjunangi alatji, “Ngula Christanya Wankarunkupainya Godalu kalkuntjanya pitjanyangka palunya pulkara pikatjaralku munuya iluntankuku. Ka nyara palula malangka Mama Godalu palulawanungku wiru mulapa palyalku anangu tjuťa pukulmankunyjtjikitjangku.” Kaya palulangu ru wangkatjara tjuťanguku rawangku kuliningi alatji, “Yaaltjingara Godalu anangu tjuťa wankarunkuku? Yaalara paluru tjananya wankarunkuku?” Alatjiya rawangku kulira aritiringi.

¹² Palu Godalu tjanala wangkangu alatji, “Tjukurpa nyanga nyura kuwari wangkanytja kuwari utiringkuny-tja wiya, palu ngula mulapa kutju utiringkuku anangu malatja malatja tjuṭangu nyakunytjaku.” Ala nyangatja, tjana iriti tjukurpa Godaku tjakultjunangi nyura malatja tjuṭangu kuwari utiringkunyaangka nyakunytjaku. Panya kuwari Godalu Kurunpa Milmilnga ilkarṅinguru iyanu tjukurtjara tjuṭa witulyankunytjaku, kaya paluru witulyankunyaangka nyurala Tjukurpa Palya Jesunyatjara tjakultjunu tjukurpa wiru mulapa. Ka panya angelpa tjuṭa kulu mukuringanyi tjukurpa nyanga palunya kulira nintiringkunjkitja, palu putuya kulini.

Godalunya Mantjinu Palya Mulapa Nyinanytjaku

¹³ Palulanguru palya kulil-kulipa nyinama Godala wanganarangu kulira palyantjikitja. Munuya watarku nyinawiyangu pukultu ala-alangu patara kulinma panya ngula Jesunya Christanya malaku pitjanyaangka Godalu mukulya pulkangu nyurampa wiru mulapa palyalku. ¹⁴ Panya nganmanypa nyura ngurpa nyinangi munu nyura kura tjuṭaku kutju mukuringangi. Palu kuwari nyanga nyura uti kura tjuṭa wantira Godala kutju wanganarangu kulira palyanma. ¹⁵ Panya Godanya palya mulapa nyinanyi. Ka palulanguru nyura uti palu purunypatu nyinama palya mulapa, panya Godalu nyuranya ngurkantanu palumpa walytja nyinanytjaku. ¹⁶ Nyanga alatji nyiringka iriti walkatjunkunytja ngaranyi Godalu wangkanytja,

“Palya mulapaya nyinama. Nyanga ngayulu palya mulapa nyinanyi, palu purunypaya nyinama.” *

¹⁷ Nyura panya Godala tjapira palunya mamananma walakulpai. Nyaratja palya, palu watarkurinytja

* [1:16](#) [Leviticus 11:44-45](#)

wiyangkuya kulinma panya paluru anangu tjuṭa tjukaṛurungku ngurkantankupaiṭu nyinanyi. Panya paluru anangu uwankara tjungu nyanganyi ngurkantankunytjikitjangku, nyuranya kuḷu. Munu paluru wiru palyannyangka nyakula palyanmananyi munu kura palyannyangka nyakula kuranmananyi. Palulanguṛu nyura uti mantangka nyanga unytju nyinaralpi Godalawanu nyinama palunya kutju rawangku mayatjanmara walkura. ¹⁸⁻¹⁹ Nyura panya tjamuku arangka nganmanypa nyinangi, palu ara nyara palulawanu nyinara nyura iwara kura puṭu wantikatingi. Ka panya kuwari nyuranya Godalu iwara kurangka ngaranyangka mantjira iwara palyangka tjunu palumpa walytjaringkunytjaku.

Palu kulilaya, yaaltji-yaaltjingku Godalu nyuranya kurangka ngaranyangka mantjinu munu wankaṛunu? Paluru wanyu mani pulka ungkula nyuranya mantjinu? Wiya, panya mani mantatja kutju unytju ngarala wiyaringkupai. Palu panya Godalu nyuranya mantjinu Jesula Christalawanungku panya paluru punu katakutjarangka milkali tjutinytjitjanguṛu. Nyara paluru panya lamalama wiru mulapa ungkunyntja purunypa, panya wati tjukurtjarangku nganampa kuranguṛu lamalama pungkula Godanya ungkupai palunya pukulmankunytjikitjangku, nyara palu purunypa Jesunya nganampa lamalama wiru mulapa ngalkilpa ilungu Godalu nganannya kura tjuṭa palyantjitjanguṛu kalypangku pungguwiyangku wantinytjaku. Jesunya milkali tjutinytjitjanguṛu Godalu wiru mulapa nganampa palyanu nganana iwara kuranguṛu karalyarira iwara palyangka ankunytjaku Godaku walytja mulapa.

²⁰ Panya nganmanytju manta ilkari paluntja kuwari-pangka Godalu kuliningi Christanya mantakutu iyantjik-

itjangku nyuntunya ngana_nnya wanka_runkunytjaku. Ka mulapa_tu palu_ru pitjala nganampa ngalkilpa anga-
ilungu. ²¹ Ka ngana_na palulangu_ru Godaku mula-
mularinganyi, panya palu_ru alatjitu Christanya ilun-
yangka wanka_ra pakaltjinga_nu munu panya palunya
ngura ilka_ritjangka tjunu mayatja pulka nyinanytjaku
palula itingka. Ka nyara palulangu_rulta ngana_na mulapa
Godaku mulamularinganyi munula palumpa ala-ala_ngku
pa_tara kulil-kulilpa nyinanyi, watarkurinytja wiya.

Godalu Al_tinyangka Palula Wanga_narangku Kulint-
jaku

²² Uwa, nyura panya tjukurpa tjuka_ruru Jesunyatjara
wanga_narangku kulintjatjanungku kura tju_ta wantira
palya mulapa nyinanyi munu nyura kuwari Jesuku wa-
lytja tju_taku pulka_ra mukuringanyi. Nyanga palulangu_ru
nyuranku uti ti_tutjara pulka_ra mukuringama kurunpa
winki. ²³ Panya nyura Godaku katja un_talpa nyinanyi
palumpa panya tjukurpa kuli_ra mulamularingkunytjat-
janu. Panya tjukurpa nyara palu_ru kurunpa pampul-
pai munu ti_tutjara ngara_papai wiyaringkunytja wiya. Ka
tjukurpa palumpa mulamularingkunyangka Godalu nyu-
ranya katjanmara un_talpanmanu. Nyura nga_nmanypa
i_ti ngaringi mamangu_ru ngunytjunguru, ka puntu nyara
palu_ru wiyaringkupai. Palu kuwari Godanya nyurampa
mama nyinanyi ti_tutjara nyinapainya, ka nyura kulu palu
pu_runypa ti_tutjara wanka nyinaku.

²⁴⁻²⁵ Panya nyiringka nga_nmanytju walkatjunkunytja
ngara_nyany nyanga alatji,
“Tjanpi panya rawa wanka ngara_nanytja wiya mapalku
pil_tiringkupai,
munu inuntji kulu unytju wi_ru ngara_nala punkara
wiyaringkupai.

Ka nyara palu puṛunypa aṅangu uwankara rawa nyinanytja wiya ilupai.

Palu Mayatja Godaku tjukurpa wiyaringkuntja wiya tiṭutjara alatjitu ngaraku.” *

Ka panyala tjukurpa nyanga wiru palunya nyurala nganmanytju tjakultjunu.

2

¹ Nyanga palulanguṛuya kura tjuṭa palyalwiyangku wantima. Munuya ngunti wangkawiyangku wantima, ngunti palya-palku nyinawiyangku wantima, munuya kutjupangku wiruṛa palyannyangka nyakula nyararingkuntja wiyangku wantima, munuya kampangkatu tjaalymara aṅangu kutjupa wangkawiyangku wantira wiruṛa nyinama. ² Munuyanku kurunpa winki Godaku tjukurku mukuringkula nintiringama, panya iti kulunytju ipiku pulkara mukuringkula rawangku tjikilpai, palu puṛunypaya Godaku tjukurku mukuringama. Panya iti kulunytju rawangku ipi tjikira pulkaringkupai munu wiruṛa wanka nyinapai, palu puṛunytjuya Godaku tjukurpa rawangku kulira nintiringama, ka nyuranya Godalu wankaru tiṭutjarangku kanyilku. ³ Panya mulapa nyura nganmanypa nintiringu Mayatja Jesunya ngaltunytju pulka mulapa nyinanytjitja kulira.

Jesulakutu Ilingkuntjaku

⁴ Uwa, Mayatja Jesulakutuya ilariwa, panya paluru puli puṛunypa nyinanyi palu wanka. Panya aṅangu tjuṭangkuya palunya kura-palku wantingi, palu Godalu palunya ngurkantanu wiru mulapa uwankarangka waintarinytja. ⁵ Panya paluru nyuranya Mayatja

* 1:24-25 Aitjyaku 40:6-8

Jesulakutu pitjanyangka mantjira palula tjungura kanyilku, panya wali palyalpai tjuťangku puli tjuťa tjunkula tatilpai wali wiru palyantjikitjangku, nyara palu purunypa nyura Jesulakutu pitjanyangka Kurunpa Milmiltu nyuranya palula tjungura utulu kutju palyani wali wiru purunypa nyura uwankara tjukurtjararingkula Godala mirangka tjukaruru wiru mulapa ngaranytjaku. Munu nyura uwankarangku tjukurtjararingkula Godanya pukultu walkura mirawanipai. Ka paluru pulkara pukularipai nyura Jesuku Christaku mulamularingkula walkunnyangka. ⁶ Panya nyiringka iriti walkatjungkuntja ngaranyi Godalu wangkanytja nyanga alatji,

“Ngayulu puli tjiwa wiru mulapa ngurkantara tjunanyi kuunangka wali panya Tjayangga kunpu mulapa palyantjikitjangku.

Ka anangu kutjupa palumpa mulamularingkulampa Godala mirangka kuntaringkuwiya rapa alatjitu ngaraku.” *

⁷ Uwa, puli nyara paluru panya Mayatja Jesunya, ka nyura palumpa mulamularingkupai tjuťa ninti panya paluru wiru mulapa. Kaya palumpa putu mulamularingkupai tjuťangku palunya kura-palku kulilpai. Panya iriti nyiringka walkatjungkuntja ngaranyi nyanga alatji,

“Wali palyalpai tjuťangkuya wali puli tjuťanguru palyanangi,
munuya puli kutju nyakula waningu kura-palku kulira.

Palu nguntiya waningu, panya puli nyara paluru kura wiya, wiru mulapa wali kunpu ngaranytjaku kanyilpai.” *

* 2:6 Aitjayaku 28:16 * 2:7 Psalm 118:22

⁸ Ka tjukurpa kutjupa kulu iriti nyiringka walkatjunktunytja ngaranyi nyanga alatji, “Anangu tjuṯa puli nyanga palulawanu ankunyangka puli paluru tjananya tarpipungkula mantangka punkatjingalpai.” *

Alatji nyiringka iriti walkatjunu, ka puli paluru Jesunya, panya kuwaripatjara Godalu kutjupa kutjupa uwankara paluntja kuwaripangka paluru mukuringu anangu tjuṯa Jesuku Christaku mulamularingkunytjaku. Munu palulanguru piruku kulinu, “Palu anangu kutjupa tjuṯangkuya Tjukurpa Palya Jesuku kulira wantiku, munuya palulangurulta ngayulanguru titutjara alatjitu paṯu nyinaku.” Nyanga alatji Godalu nganmanytju kuliningi, ka panya palumpa wangkatjarangku nyiringka iriti walkatjunu tjukurpa nyanga pulitjara.

⁹ Palu Godalu panya nyuranya ngurkantara tjunu palumpa walytjapitiringkula nyinanytjaku palya mulapa, ka nyura uwankara palumpa tjukurtjara tjuṯa nyinanyi, Mayatja panya pulkaku. Panya paluru alatjitu nyuranya uwankara ngurkantara tjunu anangu tjuṯangka tjakultjunktunytjaku paluru wiru tjuṯa palyantjitja. Panya Godalu nyuranya ngurkantanu mungawaluringka nyinanyangka kura wantira palula tjunguringkula nyinanytjaku tili wiru mulata. ¹⁰ Nganmanyapa panya nyura mungutja purunypa nyinangi. Palu kuwari nyanga nyura palumpa walytjapiti mulapa nyinanyi. Nganmanyapa panya nyura ngurpa nyinangi, palu kuwari nyanga nyura nintiringu panya paluru nyuranya ngaltunytju pulkangku atunymara kanyini.

Jesuku Walytja Wiya Tjuṯangka Palyanyku Nyinanytjaku

* 2:8 Aitjayaku 8:14

¹¹ Uwa walytja wiru tjuṭa, panya nyura mantangka nyanga unytju kutju nyinanyi malikitja puṛunypa, palu ngula nyura ngura ilkaṛitjanka wirkaṛa nguraṛarira nyinaku. Palulanguruṇa pulkaṛa nyuranya wituwituṇi, “Kulintja kura nyurala unngu utiringkunyangkampaya kura palyantjikitjangu kulintja wiyangu wantima. Panya kulintja kura nyanga paluru tjana nyuranya rawangu mukumukuṇi kuraringkunyjtaku, kaya palula-tawara kulintja palunya tjananya wantima kulintja wiyangu.” ¹² Panya Jesuku walytja wiya tjuṭaya ngura winkingka nyurala tjungu nyinara-waṇinyi munu nyuranya kutjupa kutjupa palyannyangka nyakula tjinguru kuranmankuku. Palula-tawaraya palya kutju tjukaṛurungku palyanma, kaya palulanguruṭa nyuranya wiru palyannyangka nyakula Godanya walkuku tjintu nyara palula panya Jesunya malaku pitjanytja-aṛangka.

Mayatja Tjuṭangka Wanganarangu Kulintjaku

¹³⁻¹⁴ Uwa, Mayatja Jesunya mukuringanyi nyura palumpa walytja uwankara mantangka nyanga nyinara mayatja mantatja tjuṭangka wanganarangu kulintjaku. Panya mayatja pulka nyinanyi ngura ini Rome-ala ngura tjuṭaku mayatja munu mayatja nyara paluru wati tjuṭa iyanu ngura kutjunga kutjunga mayatjarira kanyintjaku, anangu kura palyalpai tjuṭa pungkunyjtaku munu wiru palyalpai tjuṭa pukularira mirawaṇinytjaku. Ka nyura uti mayatja nyanga paluru tjana wangkanyangka wanganarangu kulira palyanma. ¹⁵ Panya anangu ngunti wangkapai tjuṭangu nyuranya puntura wangkapai Godaku panya ngurpangu. Palu Godanya mukuringanyi nyura tjukaṛuru palyanyku nyinanytjaku. Panya nyara palulanguruṇa nyura tjukaṛuru wirura nyinanyangka nyakula ngunti

wangkapai paluru tjana puṭu kulilku nyuranya puntaṛa wangkanytjikitjangku.

¹⁶ Uwa, rawangkuya wiru tjuṭa kutju palyanma Godaku, panya paluru nyuranya palumpa waṛkarinytjaku pauntjingara wituwitulpai wiya puritjina purunypa. Palu nyura panya palula wanganarangku kulilpai pukularira, Christala tjungu nyinara. Palu tjinguru nyura ngunti kulilku alatji, “Nganaṅa Jesuku walytja nyinanyangka kutjupangku nganaṅanya puritjina purunypa puṭu pauntjingara wituwituṅi. Wanyula unytjungku kutjupa kutjupa kura palyanma.” Palu wiya, nyanga alatji kulintja wiyangkuya wantima panya nyura Godaku waṛkaripai tjuṭa munu nyura uti palulawanu tjukaṛuru nyinama.

¹⁷ Munu nyura uti anangu uwankarangka purkarangku wirura wangkama pauntjingantja wiyangku. Munuya Jesuku walytja uwankaraku pulkara mukuringama wantinytja wiya. Munuya kulinma Godanya panya pulka mulapa nyinanyi nganaṅa ngalya-ngalyparingkunyjtaku wiya. Ka panya mayatja pulka nyara Rome-ala nyinanyi, pala palulaya wanganarangkuṭu kulinma kuraringkula wantinytja wiyangku.

¹⁸ Kaṅa kuwari nyanga nyurala wangkanyi wati waṛkaripai tjuṭangka. Uti nyura nyurampa mayatjanga wanganarangku kulira waṛka palyanma. Tjinguru nyura kutjupa tjuṭa mayatja wirungka waṛkarinyi panya paluru nyuranya ngaltunytjungku mukulyangku wirura kanyini. Ka tjinguru nyura kutjupatjara mayatja kurangka waṛkarinyi, ka nyuranya tjinguru mirpantjungku pauntjingara wangkanyi. Palu uti nyura mayatja uwankarangkaṭu wirura wanganarangku kulinma panya mayatja mukulyangka kutju wiya, palu mayatja mirpantjungka kulu.

¹⁹ Tjinguru nyurampa mayatjangku nyuranya mirpanarira pungkuku wiyanguru alatjitu, ka nyura uti Godanya kulira mirpanariwiya wirura rawa warakarima, ka Godanya nyakula nyurampa pukulariku. ²⁰ Palu tjinguru nyurampa mayatjangku nyuranya kura palyannyangka pungkuku. Nyaratja palya, panya nyurampa kuranguru paluru nyuranya punganyi. Ka nyuranku uti mirawaniiyangku wantima panya Godanya kura palyannyangka nyurampa pukularinytja wiya. Palu wiyanguru pungkunyangkaya mirpanariwiya rawatu warakarima, ka pala palulanguru Godalu nyuranya nyakula palyanmankuku.

²¹ Panya Jesulu Christalu nyurampa ngalkiltu pika pulka mantjinu nyura palunya ngapartji arkantjaku. Panya Godalu nyuranya ngurkantanu Jesunya purunypa ara nyanga pikawanu nyinanytjaku. ²² Panya paluru kura palyantja wiya alatjitu, munu ngunti kulu wangkanytja wiya ngarangi. ²³ Ka tjana anara kurara pungkunyangka paluru ngapartji wangkanytja wiya, munu pungkunyangka ngapartji pungkunytjikitjangku wangkanytja wiyatu. Paluru wantingi Godalu kutjungku tjananya ngula ngurkantara tjarantjaku, panya paluru tjukarurungku ngurkantankupai. ²⁴ Palu Jesunya panya nganampa kuranguru punu katakutjarangka ilungu nganampa ngalkilpa, nganaa kura wantira Godalawanu tjukaruru nyinanytjaku. Uwa, Jesulu nganampa ngalkiltu pika pulka mantjinu nganaa nganampa kuranguru wankaringkunyitjaku. ²⁵ Panya tjiipi purunypa nyura kawankatingu. Palu kuwari nyanga nyuranya Godalu malakungku arurilyira ngalya-katingu, ka Jesulu Christalu tjapata palyangku nyuranya rawangku atunytju kanyini.

3

Kurirara Mukulya Wanganara Nyinanytjaku

¹⁻² Uwa, kana kuwari palu purunypatu nyurala wangkanyi minyma kuritjara tjutangka. Uti nyura wati kuringka wanganarangku kulinma. Tjingu ru nyuntumpa kuringku Godaku tjukurpa kulilpai wiya, palu nyuntu wirura nyinanyangka nyakula paluru tjingu ru ngula Jesuku mulamularingkuku. Palu nyuntu palunya rawangku wangkara wituwituntja wiyangku wantima, panya nyuntu wirura tjukaruru nyinanyangka kutju wati paluru nyuntunya nyakula tjingu ru Godaku mulamularingkuku. ³ Panya minyma kutjupa tjutangkuya wiru mulapa nyinanytjikitjangku mangka rawangku kumamilara wirulpai kutjupa kutjupa wiru tjuta tjunkula, munuya liritja manyirkitja kulu tjunkupai gold-nguru palyantja. Munuya mantara wirungka tjarpapai mani pulkatjangka, munuya kulilpai, “Nyanga alatji palyarala wiru mulapa ngaranyi.” Palu nyura uti alatji kulilwiyangku wantima, panya nyanga palula tjanalangu ru nyura wiruringkupai wiya.

⁴ Palu nyura titutjara wiru mulapa nyinanytjikitja mukuringkulampa nyuranku kurunpa mukulya pulkatjara nyinama munuya pukultju piluntju nyinama mirpanarinytja wiya. Ka Godalu nyuranya mukulya winki nyinanyangka nyakula pulkara pukulariku, panya Godalu unngutja nyakupai munu nyara palulangu ru kurunpa pukultju piluntju nyinanyangka nyakula pukularipai. ⁵ Panya iriti mulapa minyma Godaku mulamularingkupai tjuta nyanga alatji nyinangi kurunpa pukultju piluntju, munuya tjanampa kuri tjutangka wanganarangku kuliningi. Nyanga palulangu ruya wiru mulapa nyinangi, mantara kutjupa kutjupa tjuta tjana kanyintjitjangu ru wiya.

⁶ Palu minyma Tjiiranya kulinma wati panya Aipuramaku kuri, panya paluru palu purunypa nyinangi munu palumpa kuringka wanganarangku kuliningi munu palunya mayatja kulira walkuningi. Ka nyura Tjiiranya purunypa nyinanytjikitja mukuringkulampa wirura palyanyku nyinama munu titutjara rapa nyinama nguluringkunyta wiya.

⁷ Uwa, ka wati tjuṭa nyura uti minyma kuri tjuṭa mukulyangku wirura kanyinma tjanampa kuraringkunyta wiyangku, panya minyma tjuṭa upa nguwanpa wati purunypa kunpu nyinanytja wiya. Panya Godalu wati tjuṭa kutju wankarunkunyta wiya minyma tjuṭa kulu wankarunkuku wanka titutjara nyinanytjaku. Tjinguru watingku minyma kuri pungkuku munu tjinguru paluru Godala tjapintjikitja mukuringkuku, ka Godalu palunya kulintja wiyangku wantiku. Palula-tawarayanku minyma kuringka wirura tjungu nyinama.

Nyuranya Kurannyangka Kulira Wantinytjaku

⁸ Kana nyangatja nyura uwankarangku kulintjakulta wangkanyi. Kaya kulinma, munuyanku tjungu kalypa nyinama mukulya pulkatjara, panya kuta malanyku pulkara mukuringkupai, palu purunypayanku mukulya nyinama. Munuyanku kanany-kananyta wiyangku ngaltunytjungku tjananya kanyinma. ⁹ Tjinguru kutjupangku nyuranya kurannyangka nyura ngapartji tjananya kurantja wiyangku wantima. Ka tjinguru kutjupangku nyuranya pauntjingara warkiku, ka nyura ngapartji palu purunymankuwiyangku wantima. Palu mukulyangkuya tjananya wangkama munuya Godala tjanampa tjapinma tjananya wirura kanyintjaku. Panya Godalu nyuranya ngurkantanu munu nyuranya pukulmankunytkitjangku kalkunu, ka nyura ngapartji

uti palulanguru anangu kutjupa tjuṭa pukulmanama.

¹⁰ Panya nyiringka iriti walkatjunkunytja ngaranyi alatji,
 “Nyura pukulpa wirura nyinanytjikitja mukuringkulam-
 paya kura tjuṭa wangkawiyangku wantima,
 munuyanku ngunti wangkanytja wiyangku
 tjukarurungku kutju wangkama.

¹¹ Munuya kura tjuṭa wantira kampa kutjuparira wiru
 tjuṭa kutju palyanma,
 munuya kurunpa winkingku kulinma uwankaraku
 kalypa nyinanytjikitjangku.

¹² Panya Godalu tjukaruru nyinapai tjuṭa atunymara
 kanyilpai,
 munu palula tjapinnyangka tjananya
 wanganarangku kulilpai.

Palu paluru kura palyalpai tjuṭa kulilwiyangku wantipai.”

*

¹³ Tjinguru nyura kurunpa winki mukuringanyi
 wirura nyinanytjikitja, ka nyara palulanguru
 palyanyku nyinanyangka anangu kutjupangku nyuranya
 kurantjikitjangku kulintjatjanungku puṭu kulira wantiku.

¹⁴ Palu tjinguru nyura tjukaruru nyinanyangka kutjupa
 tjuṭangku nyuranya rawangku wangkara kuranma.
 Palu tjanampa nguluringkula tjituru-tjitururinytja
 wiyangkuya wantima, panya Godalu nyuranya
 pukulmara kanyilku kura pala palula tjanalanguru. Ka
 tjananya kulira wantima. ¹⁵ Munuya Jesunya Christanya
 kurunpa winkingku mayatjanmara walkunma.

Ka tjinguru kutjupa tjuṭangku nyuranya tjapilku,
 “Nyaaku nyura Jesuku pukulpa mulamularinganyi?”
 Ka nyura nganmanytju kulintjatjanungku alatji
 tjapinnyangka ngulu wiyangku palula tjanala utingku
 tjakultjunama tjana kulintjaku Jesunya panya nganampa

* [3:12](#) Psalm 34:12-16

mayatja munu wankaꞑunkupainya. Palu tjanala kaꞑany-
kaꞑanytju wangkanytja wiyangkuya purkaꞑangku
wangkama mukulyangku.

¹⁶ Uwa, tjana nyuranya anannyangka tjanampa pikar-
ingkunytja wiyangku wantima, panya Godalu pikar-
ingkunyangka nyakula nyurampa pukularinytja wiya,
ka nyura kulira kunꞑaringkuku. Palulanguꞑuya tjanala
purkaꞑangku wiruꞑa wangkama, kaya nyuranya anan-
tjatjanungku mala kunꞑaringkuku nyuranya Christa-
lawanu wiruꞑa nyinanyangka nyakula. ¹⁷ Tjinguꞑuya
nyuranya punganyi nyura tjananya kurannyangka palatja
palya panya nyurampa kuranguꞑuya nyuranya pun-
ganyi. Palu tjinguꞑuya nyuranya wiruꞑa tjukaꞑuru ny-
inanyangka punganyi, ka nyara palulanguꞑu Godanya
nyurampa nyakula pulkaꞑa pukularinyi, panya nyura
palula wangaꞑarangku kulira wiruꞑa nyinanyi, kaya
ngunti nyuranya punganyi.

¹⁸ Wanyuya Jesunya Christanya kulinma, panya
paluru kura wiya alatjitu tjukaꞑuru mulapa munu
panya nganampa ngalkilpa anga-ilungu kura palyalpai
tjutaku nganaꞑanya Godala tjunguntjikitja. Paluru
nyuntumpa nganampa kuranguꞑu ilungu kutju-aꞑa
Godanya nganampa kalyparingkunytjaku. Paluru
aꞑangu alatjitu ilungu, palu Kurunpa Milmilꞑu palunya
ilunyangka wankaꞑa pakaltjingaꞑu. ¹⁹ Ka paluru kurunpa
anu ngura kutjupakutu munu kurun-kurunpa tjuꞑangka
tjukurpa wangkangi, panya ngura nyara palula Godalu
palunya tjananya tjailangka purunypa kanyini. ²⁰ Panya
paluru tjana iriti Godala tungunpungangi Noah-lu
panya pauta pulka palyantja-aꞑangka, ka panya Godalu
tjananya uru pulkangka uwankara iluntanu munu
tjananya kurunpa tjuꞑa tjailangka purunypa tjunu
rawa nyinanytjaku. Nyara palula aꞑangka Noah-lu

pauta rawangku palyalkatinyangka Godanya anangu tjuṭaku paṭaningi paluru tjana malaku palulakutu aruringkunyjtaku, palu tjana wantingi. Kaya Noahnya tjana anangu 8 kutju pautangka tjarpara wankaringu Godalu uru panya pulkangka katurā katinyangka.

²¹ Ka palu purunypa kuwari Godalu nganananya wankarunanyi. Panya anangu kutjupa minangka baptise-katinyangkala nyakula kulilpai palunya Godalu wankarunkunyjtja. Palu nganananya nyaaku minangka baptise-katipai? Miri paltjira raputji kilinankunyjtaku? Wiya, nganana Godala tjpilpai paluru nganananya palula mirangka kunta wiya ngaratjungkunyjtaku. Ka mulapaṭu Godalu nganananya baptise-katinyangka alatjingalpai, panya paluru Jesunya Christanya ilunyangka wankara pakaltjinganu, nyara palulanguṛu Godalu nganananya wankarunkupai. ²² Ka panya Jesunya pakantjatjanu ngura ilkarikutu anu munu kuwari nyinanyi mayatja pulka mulapa Godala tjungu palula kampa wakungka, munu paluru mayatjarira kanyini ilkaritja kutjupa kutjupa uwankara, angelpa tjuṭa, mayatja kutjupa kutjupa tjuṭa kulukulu.

4

Kampa Kutjuparira Tjukaṛuru Nyinanyjtaku

¹ Uwa, panya wati kura tjuṭangku Jesunya Christanya pulkara pungkula pikatjaranu mantangka nyanga nyinanyangkalpi, palu pungkunyangka paluru rapa ngarangi Mama Godanya mukuringkunyjtjtja kutju kulira. Ka nyura uti palu purunyjtjuṭu kulinma munuya anangu tjuṭangku nyuranya pungkula pikatjarannyangka rapa ngarama. Panya anangu kutjupangku Jesunya purunypa pikangka rapa ngarala Godanya pulkara kulilpai munu kura palyalpai wiya. ² Palulanguṛuya

nyura mukuringkunyjtjtja wantima munuya Godala kutju wanganaranguku kulira paluru mukuringkunyjtjtja kutju palyanma.

³ Panya nyura nganmanypa kurangka nyinangi Godaku ngurpa. Nyaratja nyura Godaku ngurpa nyinara kunta wiya anangu kutjupa kutjupangka ngaringi nyuranku mukuringkunyjtjtja kutju kulira. Munu nyura tjunguringkula waina pulka tjikira tarangkarira kutjupangka kutjupangka ngaripai kuri mulapa wantikatira. Munu panya nyura kuranguku god ngalya-ngalya tjuta walikulpai nyinangi.

⁴⁻⁵ Palu kuwari nyanga nyura Jesuku walytjaringkula kura tjuta wantipairingu, kaya Godanya kulilpai wiya tjutanguku nyuranya nyakula urulyarani, panya nyura tjanala tjunguringkula kura palyalpai wiyaringu. Kaya kuwari nyuranya anara kura tjuta wangkara ikaringkupai. Palu nyara palunya tjananya ngula Godalu kuranyu ngaratjungkula wangkaku tjana mantangka nyinara palyantjtjtja uwankara utingku tjakultjungkunyjtjaku. Panya paluru mulapa anangu uwankara ngurkantara tjaralku, wanka tjuta munu miri tjuta kulukulu. ⁶ Panya kutjupanguku Tjukurpa Palya Jesunyatjara miri tjutangka kulu wangkara tjakultjunu tjana kulu kulira Godala tjunguringkula titutjara nyinanyjtjaku. Paluru tjana panya nganmanypa ilura wiyaringu. Palu Godalu tjanala Tjukurpa Palya tjakultjungkunyjtjaku iyanu tjana kulu kulira mulamularingkunyangka Kurunpa Milmitu tjananya kulu wankarunkunyjtjaku.

Ngapartji-ngapartjingku Atunymankunyjtjaku

⁷ Ka tjintu ilaringu ilkari manta uwankara wiyaringkunyjtjaku. Kaya purkaranguku atatjura kulilkatima tjukarurungku Godala tjapintjikitjangku.

⁸ Palu pulka mulapa ngaranyi nyanga alatji uti nyuranku pulkara mulapa mukuringama kurunpa winki. Panya nyura anangu kutjupaku nganmanypa alatjitu pulkara mukuringkulampa palumpa mapalku kalyparingkuku nyara paluru nyuranya kurannyangka.

⁹ Ka tjinguru Jesuku walytja kutjupa malikitja ngura kutjupanguru pitjanyi kaya nyakulampa mapalkungku nyurampa ngurangka altira tjunama papulankuwiyangku, munu palunya pukultu kanyinma mirpan-mirpantu wangkanytja wiyangku. ¹⁰ Panya Godalu nyuranya kutju kutju pukultjungku nintilpai munu witulyankupai warka walytjangku walytjangku palyantjaku. Ka nyura uti warka nyanga palunya tjananya nintinnyangka kutjungku kutjungku wirura palyanma anangu kutjupa tjutangku kulu kunpuringkula pukultu Jesunya wanantjaku.

¹¹ Tjinguru Godalu nyuntunya nintinu tjukurpa wangkanytjaku, ka nyuntu uti tjukurpa tjanala wangkarampa Godaku tjukurpa kutju wangkama. Tjinguru Godalu nyuntunya nintinu anangu tjuta alpamilantjaku, ka nyuntu uti tjananya pulkara alpamilanma, Godalu nyuntunya kunpunnyangka. Kaya nyara palulanguru anangu tjutangku nyuranya nyakula waintara Godanya pulkara mirawaniku munuya wangkaku, “Uwa, mulapa nyara paluru tjana Jesula Christalawanu tjukaruru mulapa nyinanyi.” Munuya nyara palulanguru Godanya pulkara walkulku. Uwa, Godanya panya mayatja witulya pulka mulapa nyinanyi pitalytji pulkanya. Kala wanyu wantinytja wiyangku titutjarangku palunya mirawanira walkunma. Uwa, mulapa.

Nyuranya Kura Pungkunyangka Pukularinytjaku

¹² Uwa walytja wiru tjuṭa, kuwari anangu Jesunya wantipai tjuṭangu nyuranya anani munu tjinguru punganyi munu kutjupa kutjupa palyani nyura pikatjararingkula tjituru-tjitururinytjaku. Ka nyura tjinguru tjituru-tjitururira kulini, “Yaaltji-yaaltjingku nyangantu nganannya kurani? Panya nganana Jesunya Christanya kutju wanalpai. Kalanya nyaaku nganannya kutju rawangu kurani?” Palu alatji kulintja wiyangkuya wantima panya Godalu nyuranya arara nyanganyi, “Yaaltji-yaaltji nyanga tjana kura nyanga tjuṭawanu kunpu ngaraku? Tjinguruya ngayunya wantinytja wiyanguk tjuṭjaranguk wanama, munta tjinguruniya pakuringkula wantiku.” Alatji paluru nyuranya arara nyanganyi panya paluru mukuringanyi nyura palunya tjuṭjaranguk tungun-tunguntu wanantjaku. ¹³ Palu pukularimaya kura nyanga palu purunypa nyurala wirkankunyangka. Panya nganmanytjuya Jesunya kuraringkula pungkula pikatjaranu munu iluntanu. Ka nyurampa ngapartji palu purunypatu ngarakatinyi. Kaya pukularima Jesunya purunypa pikatjararingkunytkitja. Panya ngula Jesunya Christanya malaku pitjaku witulya pitalytji pulka mulapa, ka nyara palula ara nyura pulkara pukulariku.

¹⁴ Panya anangu kutjupa tjuṭangu nyuranya Jesunya wananyangka nyakula anara warkipai. Palu nyaanguruya nyuranya alatji wangkara warkinyi? Wiya, panya Godaku kurunpa nyurala unngu nyinanyi kurunpa panya wiru mulapa, kaya nyara palulangu ru nyuranya anani. Kaya nyuranya warkinyangka kulira wantima munuya pukulpa nyinama. ¹⁵ Palu tjukaruruya palyanyku nyinama kura kutjupa kutjupa tjuṭa palyantja wiya. Panya nyuranya kurangu ru pungkunytkaku ngaranyi alatjitu. Palula-tawaraya miri pungkunytkaja wiya, walyt-

jatjara kutitjungkuntja wiya, irarira wangkanytja wiya, kura kutjupa kutjupa uwankara palyantja wiyangku wantima.

¹⁶ Palu tjinguru nyuranya Jesunya wanannyangka anara pungkuku, ka nyura uti kuntaringkuwiya ngarama munuya alatji kulinma, “Munta-uwa, nganaña Jesunya wanannyangkaya nyangantu nganañanya kurañi.” Munu nyura uti tjananya kulilwiyangku wantira Godanya pulkara walkunma, panya paluru alatjitu nyuranya Jesuku walytjaringkuntjaku ngurkantanu.

¹⁷ Palu kuwari nyanga Godalu anangu uwankara nyakula ngurkantanyani tjana kura munu palya nyinanytjita-nguru. Munu paluru nganañanya palumpa walytja tjuta-warara nyanganyi kura palyantjita-nguru ngurkantara paintjikitjangku. Palulangu rula alatji kulini, “Munta, Godalu nganañanya-warara ngurkantankuntjatjanungku anangu panya palunya wantipai tjuta ngurkantara pulkara paira iyalku ngura kurakutu, panya tjana Tjukurpa Palya Jesunyatjara kulira wantingi.” ¹⁸ Panya nyiringka iriti walkatjungkuntja ngaranyi nyanga alatji,

“Panya Godalawanu tjukaruru nyinapai tjutangkuya pika pulka mantjira kutju wankaringkuku.

Kaya anangu panya Godanya wantira kura palyalpai tjuta yaaltjiriku? Wiya, Godalu tjananya pulkara alatjitu pikantankuku ngalturingkuntja wiyangku.”

¹⁹ Uwa, nyanga alatji Godalu nyurala wangkanyi, panya tjituru-tjituru kutjupa kutjupa tjuta nyurala wirkankuku. Ka tjituru-tjituru nyanga paluru tjana wirkankunyangka nyura yaaltjiriku? Wiya, uti nyura Godaku mulamularingama wantinytja wiya, panya paluru nganañanya palura tjungkuntjatjanungku titutjarangku atunymara

kanyini. Paluru nganampa watarkurinytja wiya, kala uti mukulya tjukaruru nyinama nganana ala tjituru-tjituru nyanga paluru tjana wirkankunyangka.

5

Jesuku Walytjapiti Atunymankupai Tjutangka Wangkanytja

¹ Uwa, kana kuwari nyurala wangkanyi Jesuku walytjapiti atunymankupai tjutangka. Ngayulu kulu panya nyura purunypatu Jesuku walytja tjuta atunymara kanyilpai nyinanyi. Ngayulu panya ngarala nyanangi Jesunya wakara punu katakutjarangka utitjunksunyangka, mununa ngula tjintu malatjangka ngayulu palula junguringkula pukulpa mulapa nyinaku, panya nyara palula-arangka Godalu palunya uwankarangka nintilku paluru witulya pulka mulapa ngaranyangka pitalytji pulkanya. Kana kuwari nyanga nyuranya wangkanyi Jesuku walytja tjuta wirura atunymankunytjaku. ² Panya Godalu nyuranya tjunu tjananya atunymara kanyintjaku. Ka nyura uti kurunpa winki mukuringkula tjananya wanganrangku atunymara kanyinma. Panya wati tjapatangku palumpa tjiipi tjuta wirura kanyilpai, palu purunytju nyura uti Godaku walytja tjuta wirura atunymara kanyinma, panya Godanya mukuringanyi nyura alatji wirura kanyintjaku.

Palu tjanalanguru mani mantjintjikitjangku kulintja wiyangkuya wantima munuya Godaku tjukurpa tjanala pukultjungku nintinma tjanampa kutju palyantjikitjangku kulira. ³ Munu tjananya wirura purkarangku kanyinma pauntjingara wangkara wituwituntja wiyangku, panya Godalu nyuranya wirura kanyintjaku ngurkantanu. Ka paluru tjana nyuranya nyakula nyuranya purunypatu wirura nyinaku. ⁴ Ka

nyara palulanguru ngula nyurampa tjepata pulkanku
Christalu malaku pitjala nyuranya anangu winkingka
mirangka mirawanira wiru mulapa ungkuku. Ka nyara
paluru kuraringkunyitja wiya titutjara pitalytji pulka
ngaraku wiru mulapa.

⁵ Kana nyurala ngapartji wangkanyi wati yangupala
tjutangka munu kungkawara tjutangka kulu. Uti nyura
tjilpi pampa tjutangka wanganarangku kulinma tjana
wangkanyangka.

Uwa, uti Jesuku walytja uwankara kanany-kananyapa
wiya nyinama ngaltunytju pulka. Munuyanku
pukultjungku ngapartji-ngapartjinku alpamilara
palyanma, panya nyiringka iriti walkatjunkunyitja
ngaranyi nyanga alatji,

“Panya Godalu kanany-kananyapa nyinapai tjuta wan-
tipai.

Palu panya purkara nyinapai tjuta paluru
mukulyangku atunymara kanyilpai kanany-
kananyapa wiya nyinanyangka.” *

⁶ Pala palulanguruya Godala atunymankupai pulkangka
wanganarangku kulinma kanany-kananyariwiyangku,
ka ngula tjintu paluru kulintjitjanka paluru nyu-
ranya mirawanira pulka mulapa tjunkuku. ⁷ Palu nyu-
rala kutjupa kutjupa kura wirkankunyangkaya tjituru-
tjitururinytja wiyangku Godanya kulinma, panya paluru
nyuranya atunymara kanyini.

⁸ Munuya kulil-kulilpa nyinama mamu Satantu
pikatjinku nyuranya kurara punkatjingantjaku-tawara.
Panya mamu paluru lion pulka purunypa para-ngaranyi,
panya lion pulkanku kuka para-ngurilpai patjara
ngalkula paltjaringkunyitjikitjanku, palu purunytju
mamu paluru para-ngarala ngurini anangu tjuta

* 5:5 Proverbs 3:34

kurara punkatjingantjikitjangku. ⁹ Kaya Godaku rawa raparingkula mamu pala palula tungunpungama. Munuya kulinma panya Jesuku walytja kutjupa tjuṭa manta winkingka nyuranya puṛunypa nyinanyi, panya Godanya wantipai tjuṭangkuya palunya tjananya munu nyuranya kulu Jesuku mulamularingkunyangka kurara punganyi munu pulkara pikantananyi. ¹⁰ Palu nyura pika nyanga palula tjanalawanu tjukutjuku rawa nyinanyangka Godalu witulya pulkangku nyuranya wiru mularmankuku munu nyuranya kurunpa rapa kunpu alatjitu palyalku nyura palumpa pulkara titutjara mulamularingkunytjaku. Panya Godalu mukulya pulkangku nyuranya ngurkantanu nyura Jesula tjunguringkula ngura wirungka titutjara nyinanytjaku. ¹¹ Uwa, Godanya mayatja witulya pulka mulapa nyinanyi. Kala wanyu wantinytja wiyangku titutjarangku palunya kutju mirawanira walḱunma. Uwa, mulapa.

Tjukurpa Malatja

¹² Uwa, nyangatja ngayuku malpa wiru ini Tjaalatjanya ngayula tjungu nyinanyi. Paluru panya Jesunya tungun-tunguntu wanalpai wantinytja wiyangku. Kali paluru ngali lita nyangatja nyurampa mutumuṭu walkatjunu nyuranya pukulḱmankunytjikitjangku. Nyangatjana walkatjunu nyura kulintjaku panya Godanya mulapa ngaltunytju pukultju pulka nganampa nyinanyi. Kaya nyanga palunya kulira Godaku rawa mulamularingama wantinytja wiya.

¹³ Kaya ngura nyanga Papilanta Jesuku walytja tjuṭangku nyuranya kulini nyurampa pukularira.*

* **5:13** Ngura Papilannga kunyu ngura Rome-anya, panya kutjupa-ara anangu tjuṭangku ngura Rome-anya kitikiti wangkanytjikitjangku ini Papilannga wangkapai.

Panya nyanga palunya tjananya Godalu ngurkantanu nyuranya purunypa paluru tjana kulu Jesuku walytjaringkuntjaku.

Ka wati kutjupa Markanya kulu mukuringanyi ngayulu palumpa wangka nyurala tjakultjunkuntjaku. Wati nyanga paluru panya ngayuku katja purunypa.

¹⁴ Ka nyura uti anangu kutjupa Jesuku walytja nyakulampa palumpa pukularira mara witinma.

Uwa, alatjituna wangkanyi. Ka Godalu nyuranya Christaku walytjapiti uwankara kurunpa pukulpa rapa mulapa palyanma.

Tjukurpa Palya
Portions of the Holy Bible in the Pitjantjatjara language of
Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 19 Oct 2021 from source files dated 22 Nov 2019

b29b7786-0954-5b75-82cb-3657182b63d6